

Ibu bapa perlu buang sikap malu

KUALA LUMPUR 14 MAC - Sikap malu masyarakat khususnya ibu bapa untuk mendedahkan jenayah seksual melibatkan anak mereka adalah antara punca gejala sosial itu sukar ditangani sehingga akhirnya menghancurkan masa depan kanak-kanak terbit.

Pengasas Bravehearts, Australia, Hetty Johnston berkata, ibu bapa tidak sepatutnya berasa malu, berahsia atau berdiam diri apabila jenayah itu berlaku ke atas anak mereka, walaupun perbuatan itu dilakukan oleh ahli keluarga terdekat mereka.

“Dalam hal ini, ibu bapa sebaiknya perlu bertindak melindungi dan bukannya menyembunyikan apa yang berlaku kepada anak mereka.

“Malu itu sepatutnya tidak ada dalam diri kita sebagai mangsa, sebaliknya perasaan itu seharusnya ditanggung oleh pelaku jenayah seksual,” katanya ketika berkongsi pengalamannya tentang jenayah seksual kanak-kanak yang berlaku kepada anak

perempuannya dan usaha yang perlu dilakukan untuk mencegah jenayah tersebut pada Seminar Jenayah Kanak-Kanak: Hentikan!! di Pusat Dagangan Dunia Putra (PWTC) di sini hari ini.

Yang turut hadir, penceramah dalam dan luar negara, termasuk wakil P.S. The Children Malaysia, Madeline Yong, wakil Centre for the Prevention and Healing of Child Sexual Abuse (Tulir), India, Vidya Reddy dan wakil Lucy Faithfull Foundation and Stop It Now, United Kingdom, Donald Findlater.

Tambah Johnston, sikap berahsia dan berdiam diri juga tidak menyelesaikan masalah, sebaliknya memburukkan lagi keadaan dan menyebabkan kanak-kanak terbit trauma dan memberi kesan psikologi jangka masa panjang kepada mangsa,” katanya.

Sebagai usaha mencegah, ka-

tanya, Bravehearts menggariskan beberapa perkara yang perlu diberi perhatian oleh semua pihak iaitu memberi pendidikan kepada anak-anak tentang jenayah seksual kanak-kanak dan sebaiknya pendidikan itu selari dengan usia serta persekitaran anak-anak tersebut.

Katanya, pendidikan juga perlu diterapkan kepada semua pihak termasuk ibu bapa, guru dan mereka yang mengendalikan permasalahan jenayah kanak-kanak agar mereka memahami tentang isu tersebut bagi memastikan semua pihak dapat bergabung tenaga untuk menghentikan jenayah tersebut.

“Pastikan juga anak-anak anda dilindungi tidak kira di mana juga mereka berada dan sentiasa memberikan sokongan kepada mereka supaya mereka rasa diri mereka disayangi dan selamat,” katanya.



HETTY JOHNSTON